

IV. NAJVAŽNIJI RIZICI I PRETPOSTAVKE ZA USPJEŠNU IMPLEMENTACIJU SREDNJOROČNE RAZVOJNE STRATEGIJE BiH (PRSP)

1. Odlučnost vlada da ubrzaju implementaciju reformi

U periodu nakon rata vlade u BiH nisu ubrzano provodile reforme. Implementacija Srednjoročne razvojne strategije BiH (PRSP) zahtijeva veću odlučnost vlada u:

- a) očuvanju postignute političke suglasnosti u vezi sa sprovođenjem reformi,
- b) uspješnoj koordinaciji u realizaciji predloženih reformi,
- c) osposobljavanju i jačanju kapaciteta administracije da sprovode reforme.

2. Efikasnost parlamenata na svim nivoima

U prethodnom periodu sporost u provođenju reformi bila je rezultat i nedovoljne efikasnosti u radu parlamenata. Srednjoročna razvojna strategija BiH (PRSP) predviđa usvajanje i izmjenu velikog broja zakona i podzakonskih akata. Da bi oni bili usvojeni u zadanom roku bit će potrebno povećati efikasnost u radu parlamenata na svim nivoima.

3. Očuvanje socijalnog mira i političke stabilnosti

Proces ubrzanja reformi će donijeti kratkoročno povećanje nezaposlenosti, što bi moglo predstavljati prijetnju za socijalni mir. Očuvanje socijalnog mira u kratkom roku ovisit će od sposobnosti vlada da:

- a) osiguraju socijalni program, koji bi ublažio negativne posljedice povećanja nezaposlenosti,
- b) postignu konsenzus o sprovođenju najvažnijih reformi, kroz dijalog sa svim segmentima civilnog društva.

Paralelno sa ovim bit će potrebno očuvati političku stabilnost zemlje, što će zahtijevati daljnji napredak u smanjenju političkih tenzija.

4. Stabilnost zemlje i regije, oporavak svjetske ekonomije

S obzirom na opadajuću inozemnu pomoć, BiH će se u narednom periodu morati osloniti na strane investicije, kao najvažniji izvor finansiranja budućeg razvoja. U tom kontekstu, pored ubrzanja reformi i jačanja političke stabilnosti zemlje, faktor koji će uticati na priliv stranih investicija bit će i brzina oporavka svjetske ekonomije i porast investiranja u svijetu. BiH treba zadržati interes za učešće u svim regionalnim inicijativama, radi jačanja stabilnosti regije.

5. Gubljenje interesa međunarodne zajednice za BiH

Važna pretpostavka za uspješnu realizaciju Srednjoročne razvojne strategije BiH (PRSP) jeste osiguranje dodatne pomoći u vidu povoljnih kredita i grantova u manjem obimu nego u prethodnom periodu. Fokusiranje međunarodne zajednice na druge regije, ili nemogućnost vlade da ubijedi međunarodnu zajednicu u nastavak pružanja pomoći BiH, predstavljat će ozbiljnu teškoću za ostvarenje ciljeva PRSP.